

Na osnovu člana 16. stav 4. Zakona o Vladi Zeničko-dobojskog kantona ("Službene novine Zeničko-dobojskog kantona", broj 7/10), na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona, na 10. sjednici, održanoj dana 13.05.2015. godine, d o n o s i

ZAKLJUČAK

o davanju prethodne saglasnosti za zaduženje Zeničko-dobojskog kantona za realizaciju projekta „Izgradnja regionalnog vodovoda Plava voda“

I.

Prihvata se Informacija o realizaciji projekta „Izgradnja Regionalnog vodovoda Plava voda“, kao osnova za vođenje pregovora sa Evropskom bankom za obnovu i razvoj (EBRD).

II.

Daje se prethodna saglasnost za zaduženje Zeničko-dobojskog kantona za realizaciju projekta „Izgradnja regionalnog vodovoda Plava voda“ i podržava se inicijativa pokretanja procedure kreditnog zaduženja kod EBRD-a u iznosu od 7,15 miliona EUR-a, što iznosi 65% od ukupno odobrenih sredstava u iznosu od 11 miliona EUR-a.

III.

Konačnu odluku o zaduženju Zeničko-dobojskog kantona donijet će Skupština Zeničko-dobojskog kantona, po okončanju pregovora na nivou Bosne i Hercegovine sa EBRD-om, kojim će se utvrditi konačni uslovi kreditnog zaduženja.

IV.

Krajnji dužnici po ovom kreditnom zaduženju i procenti njihovog učešća u povratu sredstava predstavljeni su u Anex-u 1 (Pravna struktura) dokumenta „Osnovni uslovi zajma“, koji je u formi nacrtu paraferan od strane svih učesnika Projekta. Prema ovom dokumentu, učešće Zeničko-dobojskog kantona u povratu ukupno zaduženih sredstava je 1,925 miliona EUR-a ili 17,50 %:

V.

Imenuje se Premijer Zeničko-dobojskog kantona, Miralem Galijašević, u tim za pregovore o kreditu iz tačke II. ovog Zaključka, ispred Zeničko-dobojskog kantona.

VI.

Međusobna prava i obaveze između Zeničko-dobojskog kantona i krajnjih korisnika biće uređeni posebnim ugovorima, kojim će se regulisati međusobna prava i obaveze po ovom kreditnom zaduženju.

VII.

Zadužuje se Ministarstvo finansija Zeničko-dobojskog kantona da ovaj Zaključak dostavi JP RV „Plava voda“ d.o.o. Travnik, kao podnosiocu inicijative prema Federalnom ministarstvu finansija za predmetno kreditno zaduženje.

VIII.

Zaključak stupa na snagu danom donošenja.

Broj: 02-_____/15.

Datum, 13.05.2015. godine

Zenica

PREMIJER

Miralem Galijašević

DOSTAVLJENO:

1x Ministarstvo za poljoprivredu, šumarstvo i vodoprivredu

1x Ministarstvo finansija,

1x Premijer Zeničko-dobojskog kantona,

1x JP RV „Plava voda“ d.o.o. Travnik, putem Ministarstva finansija,

1x a/a.

O b r a z l o ž e n j e

PRAVNI OSNOV

Pravni osnov za donošenje zaključka sadržan je u odredbama člana 16. stav 4. Zakona o Vladi Zeničko-dobojskog kantona ("Službene novine Zeničko-dobojskog kantona", broj 7/10).

RAZLOZI DONOŠENJA

Javno preduzeće Regionalni vodovod „Plava voda“ d.o.o. Travnik podnio je Vladi Zeničko-dobojskog kantona zahtjev broj: 43/15 od 22.04.2015. godine za dobivanje prethodne saglasnosti za kreditno zaduženje, kojeg dostavljamo u prilogu. U predmetnom zahtjevu dato je obrazloženje da su sve odredbe kreditnog aranžmana, uključujući i pravnu strukturu, preliminarno definisane u nacrtu dokumenta „Osnovni uvjeti zajma“, koji je već parafiran od strane svih učesnika Projekta, te je iz navedenog razloga dostavljen nacrt zaključka o davanju prethodne saglasnosti Vlade Zeničko-dobojskog kantona, kako bi Javno preduzeće Regionalni vodovod „Plava voda“ d.o.o. Travnik moglo pravovremeno ispoštovati sve daljnje procedure kreditnog zaduženja.

U prilogu zahtjeva dostavljena je dokumentacija, koju dostavljamo u prilogu ovog prijedloga zaključka, i to:

- Informacija o projektu „Plava voda“ – Izgradnja Regionalnog vodovoda, broj: 42/15 od 20.04.2015. godine, izrađena od strane JP RV „Plava voda“ d.o.o. Travnik;
- Nacrt Osnovnih uvjeta zajma – EBRD, mart 2015. godine (parafiran dokument); i

U Informaciji o projektu „Plava voda“ dat je kratak historijat projekta, počev od 80-tih godina prošlog vijeka i pregled aktivnosti koje su nastavljene poslije rata od 2000. godine do danas. U citiranoj Informaciji je dat pregled sprovedenih aktivnosti do 20.04.2015. godine, od kojih su najznačajnije: preregistracija i uspostava Preduzeća JP RV „Plava voda“ d.o.o. Travnik, riješeno pitanje koncesije nad izvorištem „Plava voda“ na federalnom nivou, izrađen Idejni i Glavni projekat, pribavljeno niz saglasnosti i odobrenja nadležnih organa, na osnovu kojih je Federalno ministarstvo prostornog uređenja 24.04.2014. godine izdalo „Načelno odobrenje za građenje složene infrastrukturne građevine regionalnog vodovoda 'Plava voda'“ sa rokom važenja od 5 godina, izrađen „Elaborat eksproprijacije“ i „Elaborat o zaštite izvorišta Plava voda“, instalirana mjerna stanica za mjerenje vodostaja, te proveden niz aktivnosti na osiguranju finansijskih sredstava za implementaciju projekta, uključujući komunikaciju sa zainteresiranim stanama i informisanje javnosti.

Na osnovu zaduženja iz Zapisnika sa sastanka održanog 07. januara 2014. godine u Uredu Premijera Federacije BiH, doneseni su slijedeći akti:

- Vlada Zeničko-dobojskog kantona je donijela Zaključak broj: 02-25-19306/12 od 04.09.2012. godine, o opravdanosti izgradnje regionalnog vodovoda „Plava voda“ na području općine Zenica; (u prilogu ovog prijedloga Zaključka)
- Vlada Srednjobosanskog kantona je donijela Zaključak broj: 01-05-524/12-22 od 24.09.2012. godine, o opravdanosti izgradnje regionalnog vodovoda „Plava voda“ na području općina Travnik, Novi Travnik, Vitez i Busovača;
- Vlada Federacije je donijela Odluku o utvrđivanju javnog interesa za izgradnju regionalnog vodovoda „Plava voda“ (V. Broj 26/13 od 10.01.2013. godine);

JP RV „Plava voda“ d.o.o. Travnik na kraju Informacije navodi da su najbitnije buduće aktivnosti, za čije sprovođenje je preduslov dobijanje kreditnih sredstava, eksproprijacija zemljišta (rješavanje imovinsko-pravnih odnosa), angažman konsultanta, sprovođenje tendera za izgradnju vodovoda i početak izgradnje vodovoda.

Učesnici projekta, odnosno predstavnici općina kantona i institucija podnijeli su 31.marta 2014. godine zahtjev Evropskoj banci za razvoj (EBRD) i Razvojnoj banci Vijeća Evrope zahtjev za odobravanje kreditnih sredstava i to u iznosu od EUR 11 miliona od Razvojne banke Vijeća Evrope i EUR 11 miliona od EBRD-a, sa prijedlogom preuzimanja kreditnog zaduženja i servisiranja kredita, u kojem je navedeno da bi se polovica kredita servisirala iz vodnih naknada dva kantona i

Fonda za okoliš FBiH, direktnim uplaćivanjem na račun JP RV „Plava voda“, a drugih 50% bi vratila četiri općinska komunalna preduzeća uz garancije plaćanja od relevantnih općina, s tim da općina Travnik, budući da stavlja na dugoročno raspolaganje važan prirodni resurs, neće sudjelovati u servisiranju kredita. (Potpisnik citiranog akta ispred Zeničko-dobojskog kantona je Premijer Munib Husejnagić).

Prema Nacrtu osnovnih uvjeta zajma, koji je parafiran 20.03.2015. godine od strane svih učesnika, (parafiran od strane Premijera Zeničko-dobojskog kantona Miralema Galijaševića), udio kreditnog zaduženja Zeničko-dobojskog kantona je 17,50%, a dat je indikativni plan otplate po godinama za period od 2016.-2030. godine, što ukupno za cijeli period otplate iznosi: 4.290.830,00 KM.

OBRAZLOŽENJE SADRŽAJA PREDLOŽENOG ZAKLJUČKA

U članu I. zaključka Vlada prihvata Informaciju o realizaciji projekta „Izgradnja Regionalnog vodovoda Plava voda“, kao osnova za vođenje pregovora sa EBRD-om.

U članu II. zaključka daje se prethodna saglasnost za zaduženje Zeničko-dobojskog kantona i podržava inicijativa pokretanja procedure kreditnog zaduženja, s tim da konačnu odluku o zaduženju Zeničko-dobojskog kantona donosi Skupština Kantona, nakon okončanja pregovora na nivou Bosne i Hercegovine sa EBRD-om, kojim će se utvrditi konačni uslovi kreditnog zaduženja, kako je to navedeno u članu III. zaključka.

U članu IV. navedeno je da su krajnji dužnici i procenti njihovog učešća u povratu zaduženih sredstava predstavljeni u Anex-u 1 (Pravna struktura) dokumenta „Osnovni uslovi zajma“, koji je parafiran od strane svih učesnika projekta, odnosno naveden je iznos ukupno zaduženih sredstava za Zeničko-dobojski kanton, a u članu V. imenuje se Premijer Zeničko-dobojskog kantona u tim za pregovore o kreditu.

Tačkom VI. je utvrđeno da će se međusobna prava i obaveze po ovom kreditnom zaduženju između Zeničko-dobojskog kantona i krajnjih korisnika urediti posebnim ugovorom.

U tački VII. daje se zaduženje Ministarstvu finansija da predmetni zaključak dostavi JP RV „Plava voda“ d.o.o. Travnik, kao podnosiocu inicijative prema Federalnom ministarstvu finansija za kreditno zaduženje, kako je traženo u predmetnom zahtjevu.

U skladu sa navedenim, predlažemo Vladi da donese zaključak kao u prijedlogu.

Obrađivač:

Senada Dizdar

MINISTAR

Himzo Smajić